

Կարծիք՝ Շուշան Հարությունյանն ընդդեմ «Արմենպրես» լրատվական գործակալության

Փաստերը

2025 թվականի հուլիսի 24-ին «Արմենպրես» լրատվական գործակալության armenpress.am կայքում հրապարակվել է «Հեղինակության կառավարումը Հայաստանում. զրույց «Աքսել Մոնդրիան» ընկերության համահիմնադիր Շուշան Հարությունյանի հետ» նյութը: Երկու օր անց՝ հուլիսի 26-ին, հրապարակումը հեռացվել է գործակալության կայքից և ֆեյսբուքյան էջից: Այդ որոշումը կայացրել է «Արմենպրեսի» տնօրենը՝ խմբագրակազմի հետ անցկացրած խորհրդակցությունից հետո:

Տեղեկատվական վեճերի խորհրդին հասցեագրված դիմումում Շուշան Հարությունյանը նշել է, որ նյութի հեռացումը համարում է «գրաքննություն հանրային իշխանության կողմից, քանի որ «Արմենպրես» ՓԲԸ-ն ստեղծվել է ՀՀ կառավարության կողմից, և այդ ընկերության հիմնադրի լիազոր ներկայացուցիչներն են ՀՀ վարչապետի աշխատակազմի ղեկավարը, ՀՀ վարչապետի մամուլի քարտուղարը և «Հանրային կապերի և տեղեկատվության կենտրոն» ՊՈԱԿ-ի տնօրենը»: Ըստ դիմումատուի՝ հրապարակումը հեռացվել է առանց հիմնավոր պատճառաբանության և «Զանգվածային լրատվության մասին» օրենքի 4-րդ հոդվածով սահմանված լրագրողների գործունեության ազատության սկզբունքի խախտմամբ: «Մեր մտահոգությունն ենք հայտնում՝ նկատի ունենալով, որ նյութն իր բովանդակությամբ չի պարունակել վիրավորանք, զրպարտություն, ատելության խոսք կամ այլ հակաիրավական տարր, այլ ընդամենը ներկայացրել է մասնագիտական կարծիք», – նշել է դիմումատուն:

ՏՎԽ-ն դիմել է «Արմենպրես» լրատվական գործակալությանը որոշ պարզաբանումներ ստանալու համար, ինչին ի պատասխան գործակալության տնօրենը հայտնել է, որ նյութը հեռացվել է դրա «պատրաստման և հրապարակման ընթացքում տիկին Շուշան Հարությունյանի կողմից միջամտության պատճառով»: Մասնավորապես նշվել է, որ մինչև հրապարակումը Շուշան Հարությունյանը առարկություններ է հայտնել գործակալության թղթակցի պատրաստած տեքստի վերաբերյալ, երբ այն նախօրոք ուղարկվել էր Շուշան Հարությունյանին՝

համաձայնեցնելու համար: Դրանից հետո Շուշան Հարությունյանը գործակալությանը ներկայացրել է նյութի նոր՝ իր հեղինակած տարբերակը: Սակայն գործակալության խմբագիրը կապ է հաստատել իր թղթակցի հետ՝ նշելով, որ Շուշան Հարությունյանի առաջարկած տեքստը «հեռու է հարցազրույցի ժանրից», որից հետո թղթակիցը փոփոխել է տեքստը՝ ներկայացնելով հարց ու պատասխանի ձևաչափով: Այնուհետև նյութը հրապարակվել է հուլիսի 24-ին:

Դրանից կարճ ժամանակ անց Շուշան Հարությունյանը Արմենպրեսից խնդրել է հրապարակել նյութի՝ իր հեղինակած տարբերակը: Խմբագրի որոշմամբ հրապարակվել է այդ տարբերակը: Հաջորդ օրը՝ հուլիսի 25-ին, խմբագրակազմի ժողովի ընթացքում գործակալության տնօրենը որոշում է կայացրել հեռացնել նյութը լրատվական կայքից: Ինչպես ՏՎԽ-ին պարզաբանեց «Արմենպրեսի» ղեկավարը, այդ որոշման մասին նա «Մեսենջեր» հավելվածի միջոցով գրավոր տեղեկացրել է Շուշան Հարությունյանին, և մոտ կես ժամ հետո հրապարակումը հեռացվել է: Ըստ տնօրենի՝ նա պատրաստվում էր հրավիրել Շուշան Հարությունյանին գործակալություն և անձամբ ներկայացնել նրան իր որոշման պատճառները, սակայն քանի որ Շուշան Հարությունյանն իր Ֆեյսբուքյան գրառմամբ հրապարակայնորեն փորձել է խնդրին տալ «քաղաքական երանգավորում», այլևս անիմաստ է համարել դա անել:

Տեղեկատվական վեճերի խորհուրդը պարզաբանումներ է խնդրել նաև Շուշան Հարությունյանից: Վերջինս նշել է, որ նյութը հեռացվելուց առաջ հարցն իր հետ նախապես չի քննարկվել, իսկ հրապարակումը փաստացի հեռացնելուց անգամ իրեն որևէ պատճառաբանություն կամ հիմնավորում չի ներկայացվել: Ըստ Շուշան Հարությունյանի՝ նյութը հեռացվելուց մեկ շաբաթ անց նա էլեկտրոնային փոստով «Արմենպրեսին» ծանուցել է, որ օգտվելու է հանրային հասանելիության այլ հարթակներում հրապարակումը տարածելու իր իրավունքից, որից հետո այդ թեմայով գրառում է արել Ֆեյսբուքում, հետևաբար՝ «Արմենպրեսը» ունեցել է մեկ շաբաթ նյութի հեռացման հիմնավորումը տրամադրելու համար:

Անդրադառնալով վիճահարույց տեքստի ժանրին՝ Շուշան Հարությունյանը կարծիք է հայտնել, որ դա հարցազրույց չէր, այլ՝ մասնագիտական կարծիք:

Գործակալության տնօրենը նույնպես ՏՎԽ-ի հետ զրույցում նշել է, որ վիճահարույց տեքստը, թեև կազմված էր հարց-պատասխան ձևաչափով, դասական իմաստով չէր համապատասխանում հարցազրույցի ժանրին:

Կողմերը նաև տեղեկացրել են, որ իրենց համագործակցությունը հիմնված է եղել 2023թ. հունիսի 1-ին կնքած պայմանագրի վրա, որի պատճենը (առանց կոմերցիոն գաղտնիք պարունակող հատվածի) Շուշան Հարությունյանը տրամադրել է Խորհրդին: Ոչ դիմումատուն, ոչ «Արմենպրեսի» տնօրենը չեն առարկել, որ ՏՎԽ-ն ուսումնասիրի պայմանագիրը: Նյութը հեռացնելուց կարճ ժամանակ անց պայմանագիրը խզվել է: ՏՎԽ-ին տված պարզաբանումներում կողմերը չեն վկայակոչել պայմանագրի որևէ նորմ, որը խախտվել է վերը նշված գործողությունների արդյունքում:

Եզրահանգում

Շուշան Հարությունյանը Խորհրդին ուղղված իր դիմումում խնդրել է տրամադրել կարծիք, թե արդյո՞ք գործակալությունը չի իրականացրել գրաքննություն կամ չի խախտել «Զանգվածային լրատվության մասին» օրենքի 4-րդ հոդվածով սահմանված լրագրողների ազատ գործելու երաշխիքը, երբ հեռացրել է հրապարակված նյութը:

Խորհուրդը գտնում է, որ այն հանգամանքները, որ «Արմենպրեսը» միակողմանիորեն հեռացրել է հրապարակումն իր լրատվական կայքից և որ գործակալության հիմնադիրը ՀՀ կառավարությունն է, չեն կարող ինքնաբերաբար հանգեցնել եզրակացության, որ տեղի է ունեցել գրաքննություն: Գրաքննության նպատակը տեղեկություններ ու գաղափարներ ազատորեն տարածելու իրավունքի ճնշումն է, բազմախոհության արգելքը: Մինչդեռ «Արմենպրեսի» տնօրենը ՏՎԽ-ին ներկայացրած պարզաբանման մեջ նշել է, որ խնդրո առարկա հրապարակումը կայքից հեռացվել է այն պատճառով, որ գործակալությունն անընդունելի է համարել, որ ի սկզբանե հարցազրույցի ժանրով պատրաստված նյութը վերափոխվել և ստացել է այլ տեսք, ընդ որում՝ երկու տարբերակով, և Շուշան Հարությունյանը միջամտել է խմբագրության որոշմանը, թե դրանցից որը պետք է հրապարակվի: Ըստ տնօրենի՝ դա հակասել է գործակալության խմբագրական քաղաքականությանը և կարող էր ստեղծել վտանգավոր նախադեպ:

Առհասարակ այն հարցը, թե որ նյութը պետք է հրապարակվի, իսկ որը՝ ոչ, բացարձակապես լրատվամիջոցի որոշելիքն է: Եվ ամենևին էլ ոչ բոլոր դեպքերում է, երբ խմբագրությունները մերժում են բերված հոդվածների կամ այլ տեքստերի հրապարակումը, դա կարող է մեկնաբանվել որպես ուղիղ կամ թաքնված գրաքննության իրականացում: Մասնավորապես տվյալ վեճում գրաքննության առկայության մասին պնդումն ակնհայտորեն անտեղի է: Ընդհակառակը՝ գործակալության որոշումը տեղավորվում է «Զանգվածային լրատվության մասին» օրենքի 4-րդ հոդվածի 1-ին մասով երաշխավորված լրատվական գործունեություն իրականացնողների ազատության իրավունքի շրջանակում: Այս համատեքստում Խորհուրդը նաև արձանագրում է, որ վերոհիշյալ 4-րդ հոդվածի հասցեատերը ոչ թե Շուշան Հարությունյանն է, այլ լրատվամիջոցն ու լրագրողները, և գործակալությունը՝ իր հայեցողությամբ հեռացնելով իր հարթակում իր կողմից հրապարակված նյութը, չի խախտել նշված օրենքի որևէ դրույթ: Համենայնդեպս այդպիսի գործողության արգելք չկա:

Իր բանավոր պարզաբանումներում դիմումատուն ընդունել է, որ խնդրո առարկա նյութը հարցազրույց չէր: Գործակալությունը նույնպես նշել է, որ հեռացված նյութը «հեռու էր հարցազրույցի ժանրից»: Քանի որ «Հեղինակային ու հարակից իրավունքների մասին» ՀՀ օրենքի համաձայն՝ հեղինակային իրավունքը գործում է հարցազրույցի նկատմամբ (հոդված 12), որի պարագայում հարցազրույց տվողը և հարցազրույց վերցնողը համահեղինակներ են, տվյալ դեպքում «Արմենպրեսը» և Շուշան Հարությունյանը չեն կարող հայցել այդ օրենքով սահմանված որևէ իրավունքի խախտումից պաշտպանություն, օրինակ՝ հեղինակի անձնական ոչ գույքային իրավունքներ, մասնավորապես, հետկանչի, հեղինակային նյութի

ամբողջականության, աղավաղումներից ու փոփոխություններից պաշտպանության իրավունքները:

Քանի որ վեճի կողմերը համագործակցել են դեռևս 2023թ. հունիսի 1-ին կնքած պայմանագրի հիման վրա, տրամաբանական է և իրավաչափ իրենց տարաձայնությունները դիտարկել պատվիրատու-կատարող հարաբերությունների շրջանակում: Սակայն, ինչպես ցույց տվեց այդ պայմանագրի ուսումնասիրությունը, դրանում էլ առկա չեն նյութերի հեռացմանը վերաբերող կարգավորումներ: Նման պայմաններում նույնպես գերակայում է «Ձանգվածային լրատվության մասին» օրենքի 4-րդ հոդվածի 1-ին մասի կարգավորումը՝ լրատվական գործունեություն իրականացնողների և լրագրողների գործունեության ազատության մասին:

Այդուհանդերձ, Խորհուրդը գտնում է, որ պայմանագրային համագործակցությունը ենթադրում է, որ կողմերն իրենց տարաձայնություններն ու խնդիրը պետք է լուծեն երկխոսության, բանակցությունների, փոխադարձ զիջումների և համաձայնության գալու միջոցով, միմյանց նկատմամբ հարգալից վերաբերմունք դրսևորելով: Այս իմաստով հարցեր են ծագում. եթե գործակալությունը նյութի հեռացման որոշման մասին նախապես «Մեսենջեր»-ով տեղեկացրել է Շուշան Հարությունյանին, ապա որքանո՞վ էր արդարացված գրությունն ուղարկելուց ընդամենը կես ժամ հետո այդ հեռացումը փաստացի իրականացնելը: Արդյո՞ք այդ ժամանակը ողջամտորեն բավարար էր, որ գործընկերը տեղեկանար և արձագանքեր: Իսկ եթե նախնական ծանուցում ընդհանրապես չի եղել, ապա որքանո՞վ է դա համապատասխանում համագործակցության սկզբունքներին ու մասնագիտական նորմերին: Կամ՝ արդյո՞ք հիմնավոր են «Արմենպրեսի» ղեկավարի փաստարկները՝ նյութի հեռացման պատճառները Շուշան Հարությունյանին և գուցե նաև ընթերցողներին չներկայացնելու առնչությամբ: Բայց այս հարցերը գերազանցապես մասնագիտական էթիկայի տիրույթում են և դուրս են օրենսդրության կարգավորումից: Ուստի Խորհուրդը դրանց վերաբերյալ եզրակացությունը պատվիրակում է ՁԼՄ-ների ինքնակարգավորման Դիտորդ մարմնին և համապատասխան դիմում կհղի այդ կառույցին:

Տեղեկատվական վեճերի խորհուրդ

Շուշան Դոյդոյան (Խորհրդի քարտուղար) – Ինֆորմացիայի ազատության

կենտրոնի նախագահ

Բորիս Նավասարդյան – Երևանի մամուլի ակումբի պատվավոր նախագահ

Արա Ղազարյան – «Արա Ղազարյան» իրավաբանական գրասենյակի տնօրեն

Արամ Աբրահամյան – «Առավոտ» օրաթերթի գլխավոր խմբագիր

Աշոտ Մելիքյան – Խոսքի ազատության պաշտպանության կոմիտեի նախագահ

Օլգա Սաֆարյան – Փաստաբան